



國朝文類卷第七

七言律詩

聞擣衣

趙孟頫

露下碧梧秋滿天  
砧聲不斷思綿綿  
北來風俗猶存古  
南渡衣冠不及前  
首帶總肥宛駮  
裹批把曾泣漢嫠  
娟人間俯仰成今昔  
何待他年始惘然

溪上

趙孟頫

溪上東風吹柳花  
溪頭春水淨無沙  
白鷗自信無機事  
玄鳥猶知有歲華  
錦纜牙檣非昨夢  
鳳笙龍管是誰家  
令人苦憶東陵子  
擬問園田學種瓜



道場山

趙孟頫

絕頂清秋凌翠煙登臨應費酒如川平生能着幾  
兩屐負郭何須二頃田初日出雲光射地雙溪入  
湖波接天升高望遠我所愛青壁有路何當緣

蛾眉亭

趙孟頫

天門日湧大江來牛渚風生萬壑哀青眼故人携  
酒共兩眉今日為君開蒼崖直下蛟龍吼白浪橫  
空鵝鶴迴南望青山懷李白沙頭官渡苦相催

多景樓

趙孟頫

層巖官閣幾時脩繞檻長江萬古流白露已零秋

草綠斜陽雖好暮雲稠平南籌策張華得治內人  
才葛亮優景物未窮登覽興角聲孤起雒城秋

雨華臺

因至故人  
劉叔亮墓

趙孟頫

雨華臺上看晴空萬里風煙入望中人物車書南  
北混江山襟帶古今同昆蟲未蟄霜先實鳳鳥不  
鳴江自東綠髮劉伶綠醉死徃尋荒冢酹西風

過岳王墓

趙孟頫

鄂王墳上草離離秋日荒涼石獸危南渡君臣輕  
社稷中原父老望旌旗英雄已死何嗟及天下中  
分遂不支莫向西湖歌此曲水光山色不勝悲

錢唐懷古

趙孟頫

東南都會帝王州三月鶯花非舊游故國金人泣  
辭漢當年玉馬去朝周湖山靡靡今猶在江水悠  
悠只自流千古興亡盡如此春風麥秀使人愁

海子即事

趙孟頫

白水青林引興多紅裙翠黛奈愁何底從暮醉兼  
朝醉聊復長歌更短歌輕燕受風迎落絮老魚吹  
浪動新荷不餘溪上扁舟好何日歸休理釣蓑

弁山佑聖宮次孟君復韻

趙孟頫

意行騎馬到林間晴霧都沉遠近山瓊樹著花春

自早翠禽雙語意相關一杯到手先成醉萬事無  
心觸處閑猶欠抱琴來託宿靜中規寫水潺潺

城南山堂

趙孟頫

手種青松一萬栽草堂留在翠屏隈推窗綠樹排  
簷入臨水紅桃對鏡開春雉確迎朝日出暝禽啼  
傍夕陽來山妻也有幽棲意數日遲留不肯迴

春日言懷

趙孟頫

點點飛花欲送春萋萋芳草政愁人黃蜂釀蜜經  
營急紫燕銜泥來去頭才似茂陵非晚遇羨如曲  
逆不長貧久知求富都無益但喜論詩若有神

二月江南鷺亂飛  
雜花開樹柳依依  
落紅無數迷歌扇  
嫩綠多情如舞衣  
金鴨焚香川上暝  
畫船撸鼓月中歸  
如今寂寞東風裏  
把酒無言對夕暉

東陽八景樓

趙孟頫

山城秋色靜朝暉  
極目登臨未擬歸  
羽士曾聞遼鶴語  
征人又見塞鴻飛  
西流二水玻璃合  
南去千峰紫翠圍  
如此山川良不惡  
休文何事不勝衣

贈周景遠田師孟

趙孟頫

與子同客帝王州  
一日不見如三秋  
風高氣肅鴈

聲急天晴日暖  
蛛絲游籬下  
黃花為誰好  
水邊紅樹令人愁  
世間萬事可撥遣  
日日痛飲醉即休

金陵懷古

趙孟頫

銅雀春深漢苑空  
邯鄲月冷照秦宮  
煙花樓閣西風裏  
錦綉湖山落照中  
河水南來非禹迹  
冀方北去有唐風  
溪城秋色催遲暮  
愁對黃雲沒斷鴻

和周待制朝迴詩韻

袁掬

雉尾高張擁玉皇  
彤庭金榜粲明光  
舞階飛絮呈滕六  
執銳傳臚轉阿香  
珠帽簫聲雙窈窕  
窈窕翠旌雲影互  
方洋侍臣誰近前  
階立願紀堯年化  
日長

蛾眉班肅整皇皇恰匝松陰漏午光舞翻當軒催  
進酒表函登陞促傳香六龍捧御雲中日三象輪  
琛嶺外洋欲識兩宮清淨理薰風殿角漏初長

無題次伯庸韻

袁桷

金縷歌殘月滿江玉顏曾憶侍油幢象床雲重恩  
專壹鯨錦波翻賜疊雙春淺政宜羶作幕夜涼深  
恨鮎爲憲浣紗可是無虛匹側足寒溪濺石淙  
翠簾匝匝護朱光千葉宮桃滿院香閨苑有鸞通  
尺素虛橋無鵲寄流黃上林賦罷歸巴蜀興慶詞  
二謫夜郎不是月中親度曲世人那解聽霓裳

相期來似石城潮日望晴虹結綵橋却月眉愁歌  
漸遠凌波步近意非遙抽琴有恨迴清角疊袖無  
塵轉綠腰弄玉最憐隨鳳去秋來誰與伴吹簫  
白髮詞臣兩耳垂華腴堆笏陋牛鑿宮娥引燭催  
麻日院吏傳更寫制時蠟燃化生秋夕賜翠標疊  
勝歲華移低頭欲說唐朝舊願侍虛皇進玉卮

奉題延祐宸翰

鄧文原

欽惟 仁宗上承祖武蒐羅俊彥求治靡寧允尊  
禮儒臣務敦風化由是治書侍御史臣郭貫擢禮  
部尚書凡在選者六人惟貫進秩有加親灑宸翰

昭示龍光忝備臣僚咸增鼓舞集賢直學士臣鄧文原謹拜手稽首而作詩曰

宵旰需賢表薦紳秩宗首選贊華勛官聯天府璇璣象帝闡河圖琬琰文曾聽簫韶瞻曉日仰攀弓劍泣秋雲小臣作頌稱仁聖湛露承恩未足云

題小薛王畫鹿

鄧文原

禮樂河間雅好儒曾陪校獵奉鑾輿畫長靈圖觀遊後政暇嘉賓燕集餘蛺蝶圖二人去久騁虞詩好化行初宗藩翰墨留玕賞憑仗相如賦子虛

陪高彥敬游南山

鄧文原

不到南山又二年離離秋草映寒泉東林蕭散開蓮社西晉風流掉酒船古寺雲烟終日合長松風雨半空懸謝公未了登臨興故向禪房借榻眠

郎中蘇公哀挽志道

鄧文原

塞垣重鎮雪雲堆畫諾人稱幙府才流馬道艱逢歲儉涸魚民困得春回陽關猶記歌三疊社老俄成賦八哀夜靜燕臺山月冷祇疑化鶴一歸來

司業李公哀挽元禮

貢奎

山立庭紳聳衆觀名高真不愧儒冠文章清廟藏琛玉勲業烏堂振羽翰譽重朝端知有子貧憐身

後似無官百年者舊彫零盡展卷哀辭忍淚看

內翰哀挽悼

張養浩

束髮耽經晚益勤平生精力盡斯文先朝十老今  
餘幾當代三王獨數君李賀屢煩韓愈駕羊曇空  
阻謝女墳玉堂寥索人何在落日淇川滿白雲

送袁待制扈從上京

虞集

日色蒼涼映赭袍時巡無乃聖躬勞天連閣道晨  
留輦星散周廬夜屬藁白馬錦韉來窈窕紫駝銀  
甕出蒲萄從官車騎多如雨獨有楊雄賦最高

朝迴和周待制韻

虞集

三十六竿吹鳳皇九重春色絢天光卿雲微動旌  
旗煖湛露初晞草木香貝葉神師東度領金輿馴  
象北浮洋小臣職在歌功德拜手陳詩對日長

送朱生南歸

虞集

喜子南歸盱水上經過為我問臨川幾家橘柚霜  
垂屋何處蒹葭月滿船應有交游憐遠道試從父  
老說豐年寒機早晚成春服一一平安報日邊

題南野亭

虞集

門外烟塵接帝扃坐中春色自幽亭雲橫北極知  
天近日轉東華覺地靈前澗魚游留客釣上林鷓鴣



轉把杯聽莫誇韋曲花無賴獨擅終南雨後青

門水歸蜀

虞集

我到成都住五日駟馬橋下春水生過江相送荷  
主意還鄉不留非我情鷓鴣輕筏下溪足鸚鵡小  
憲呼客名賴得郫筒酒易醉夜深衝雨漢州城

自仁壽迴成都

虞集

還鄉思速去鄉遲王事相縻敢後期里父留看題  
壁字山僧打送捨田碑胡桃筇竹南方要盧摛批  
把上國知此日君親俱在望徘徊三顧欲何之

謝周南翁

虞集

使過池陽聞上日好懷浩蕩為君開江千維楫車  
馬集亭上持盃風雨來通夜魚龍聽語竟明年鴛  
鷺憶朝迴九華秋色翠可食為問謫仙安在哉

送李通甫赴湖南行省都事

虞集

黃鶴樓前江水春江花飛接渡江人日長青瑣文  
書簡雨過滄州杜若新應共庾公揮扇坐每尋崔  
顥賦詩頻三公舊掾多為相行見迴車載繡茵

御溝詩次宋顯夫韻

虞集

御溝雪融三月初鳧鷖鴻鴈總來居蒲挑水綠可  
為酒楊柳條青堪貫魚逶迤天河起箕尾滉漾雲

海浮青徐舟前花落徇飛燕隄上風來濕舞裾翠  
輦時留金駉裊錦波不着玉芙蓉臨流宋玉偏能  
賦莫待東都客問予

試院書事

馬祖常

棘闈粉署隔重牆校藝分官屬正郎五夜風簾燒  
蠟燭九天冰樹劑龍香周旋接武尚書履供帳留  
茵御史床臚唱閣門春色曙侍臣應奏慶雲章

題光山縣孔宰颶風亭

馬祖常

光山近在故山西樹滿岡頭稻滿畦隣屋讀書相  
教授社祠醉酒共提携水牛礪角嫌畊少野壘抽

絲喜價低春雨行田無從吏獨騎齋馬畏青泥

送宋顯夫南歸

馬祖常

琵琶溝北識君初藉甚才華二十餘欲賦兔園千  
孝邸不因狗監進相如瀟湘路熟逢知己韋杜天  
低望故居携幼歸來拜丘壟南遊莫戀武昌魚

駕發

馬祖常

蒼龍對闕夾天閣秋駕凌晨出國門十萬貔貅騎  
駉裊一雙日月繡旗旛講蒐獵較黃羊圈錫宴恩  
白獸尊赫矣漢家人物盛焉卿有賦在文園

送袁德平歸越

王士熙

平湖如鏡靜秋波禹穴西風捲碧蘿狂客有船都  
載酒道人無字不籠鵝床頭舊笏青雲近窻下殘  
編白雪多燕市塵深拂衣去海門何處問漁蓑

送王在中代祀秦蜀山川 王士熙

太華雲連蜀棧低柳花三月紫騮嘶香浮曉露金  
匳濕旛拂春烟絳節齊策牘當年登桂苑詞林後  
夜趣芝泥長安遊客應無數誰共王褒頌碧雞

題郭忠恕九成宮圖 王士熙

鐵馬歸來定太平九成宮殿暑風清龍蟠古洞長  
藏兩鳳入層臺自度笙盡棟塵空巢燕去蒼崖雲

掩路碑橫秦川忽向丹青見魂夢依稀識化城

驪山宮圖 王士熙

翠領含烟曉仗催五家車騎入朝來千峯雲散歌  
樓合十月霜晴浴殿開烽火空臺留草樹荔支長  
路認塵埃月中人去青山在始信昆明有劫灰

題鮮于伯幾與仇廉訪帖 王士熙

三生文采趙公子四海聲名仇使君彈琴不作廣  
陵散焚香遙駐博山雲玉署春來鶯漫語繡衣人  
去鴈空聞龍蛇兩紙光如玉即是安西與右軍

之語曰趙公子明日欲過寒舍看書畫廉訪相公  
能一來焚香彈琴亦佳趙公子子昂也後亦有跋

帖廉訪字彥中今其子  
公哲御史寶藏此帖

寄上都分省僚友

王士熙

天上風清暑盡消  
尚方仙隊按雲韶  
白鵝海水生鷹獵  
紅藥山岡詐馬朝  
涼入賜衣飄細葛  
醉題歌扇濕輕綃  
河堤楊柳休傷別  
八月星槎到鵲橋  
畫省薰風松樹陰  
合歡花下日沉沉  
腐儒無補漫獨坐  
故人不來勞寸心  
紫極三台光景接  
洪鈞萬象歲年深  
灤江回首九天上  
誰傷香燼聽舜琴

題節婦

王士熙

寒窻機杼泣秋風  
鏡影鉛雲不汝同  
明月有光生

夜白貞松無夢妬  
春紅羅襦舊繡天  
吳拆綠綺弦  
海鶴空陌上  
行人指華表  
閉門踈雨落梧桐

上京次伯庸學士韻

王士熙

侍臣催講御階西  
雲靜舩稜曉色低  
天闕神州卑  
兩漢地連碣石轉  
三齊含香畫永閑  
青瑣視草堂  
幽濕紫泥最憶東  
山老松樹秋風應  
有鶴來栖

大都雜詩

宋本

拋却漁竿滄海邊  
拂衣來看九重天  
畫闌九陌橋如月  
綠影千門樹似烟  
南國佳人玉幼玉  
中朝才子杜樊川  
紫雲樓上如澠酒  
孤負春風二十年

繡錯繁華徧九衢上林辭賦漢西都朱門細婢金  
條脫紫禁材官玉鹿盧萬里星辰開上界四朝冠  
蓋翊皇圖東鄰白面生純綺笑殺揚雄卧一區  
瀘溝曉月墮蒼烟十一門開日色鮮海上神山無  
弱水人間平地有鈞天寶幢珠珞瞿曇寺豪竹哀  
絲璫瑁筵春雨如膏三萬里盡將嵩呼祝老年  
形勢全燕擁地靈梯航萬國走王城狗屠已仕明  
天子牛相寧知別太平玄武鈞陳騰王氣白麟赤  
鴈入新聲近來朝報多如雨不見河南召賈生

姑蘇臺

劉致

塵塵應知易代頻吳趨誰唱不堪聞捧心臺暗梨  
花月扶日門深薜荔雲江關水犀歐治劔氣騰金  
虎闔廬墳計然已死鴟夷逝寂寞五湖西日曛

綿竹縣治

楊靜

通衢砌石蘚生鱗三兩人家屋宇新嚴子有祠存  
故里魏公無第與比隣傳說共說千年樹問話那  
逢百歲人回首向來住麗地暮雲斜日紫巖春

燕中懷古

李源道

荆卿墓上草離離郭隗臺邊對落暉戰圖山川秋  
氣壯中原豪傑曉星稀乾坤納納無人識南北年

年有鴈飛說似瀘溝橋畔柳安排青眼送將歸

宗陽宮翫月

揚載

老君臺上涼如水坐看冰輪轉二更大地山河微  
有影九天風露寂無聲蛟龍並起承金榜鸞鳳雙  
飛載玉笙不信弱流三萬里此身今夕到蓬瀛

擬去京師

揚載

囊衣橐載道傍車人事匆匆歲欲徂風雨五更維  
亂叫江湖千里鴈相呼燕菁散漫根猶美桑柘蕭  
條葉正枯却上高丘重回首五雲繚繞帝王都

貢表諸公修史

揚載

詔編國史有程期正是諸郎傑直時虎士守門宮  
窈窕鷄人傳箭漏遲遲窻間夜雨銷銀燭城上春  
雲壓綵旗才大各稱天下士書成當繼古人為

宿李陵臺

周應極

曠野平蕪入壯懷征鞍小駐李陵臺關河萬里秋  
風晚霜月一天鴻鴈來持節蘇卿真壯士開邊漢  
武亦奇才千年懷古無窮意且向郵亭酌酒盃

睢陽懷古

李鳳

睢陽城郭劫灰餘風景蕭條市井踈提接汴梁分  
驛路地連齊魯幾兵車張巡戰壘沙沉戟闕伯提

封草滿墟珍重開元遺寺在石幢猶刻魯公書

周氏慈雲庵

揭傒斯

韓阿松栢野烟飛丞相文章入鳳池華屋青山春  
掩冉浮雲流水書逶迤哺鳥時拂巖花落馴鹿長  
環宰樹悲唯有慈孫禁垣裏年年南望不勝思

元文類卷七

元文類卷第八

五言絕句

錄汴梁宮人語

楊奐

一入深宮裏經今十五年長因批帖子呼到御床

前

歲歲逢元夜金蛾鬧簇巾見人心自怯終是女兒

身

殿前輪直罷偷去賭金釵怕見黃昏月殷勤上玉

階

翠翹珠掘背小殿夜藏鈎驀地羊車至低頭笑不

休  
內府頒金帛教酬賀節盤兩宮新有旨先與問孤  
寒  
人間多棗栗不到九重天長被黃衫吏花攤月賜  
錢  
仁聖生辰節君王進玉卮壽棚兼壽表留待北還  
時  
邊奏行臺急東華夜啓封內人催步輦不候景陽  
鐘  
畫燭雙雙引珠簾一一開輦前齊下拜歡飲辟寒

盃  
聖躬春閣內只道下朝遲扶仗嬌無力紅綃貼玉  
肌  
今日天顏喜東朝內宴開外邊農事動詔遣教坊  
回  
駕前雙白鶴日日候朝回自送鑾輿去經年更不  
來  
陟覺文書靜相將立夕陽傷心寧福位無復夜薰  
香  
二后睢陽去潛身泣到明却回誰敢問校似有心



情  
為道圍城久粧奩鬪犒軍入春渾斷絕飢苦不堪  
聞  
監國推梁邱初頭靜不知但疑牆外笑人有看宮  
時  
別殿弓刀響倉黃接鄭王尚愁宮正怒含淚強添  
粧  
一向傳宣喚誰知不復還來時舊針線記得在窻  
間  
北去遷沙漠誠心畏從行不如當日死頭白若為

生

酬昭君怨

楊奐

玉貌辭金闕貂裘擁繡鞍將軍休出戰塞上雪偏寒

春日

游絲困無力欲起重悠揚芳草落花滿想思春晝長

石鼎聯句圖

劉因

玩世如一鼎姓名誰得聞仙翁應自笑知我有鄒訢

螻蛄

劉因

後利前還澁陰陽體段分不須觀兔尾即此見羲文

薔薇

劉因

色染女真黃露凝天水碧花間日月長朝暮閱兩國

采薇圖

盧摯

服藥求長年孰與孤竹子一食西山薇萬古猶不死

題張尹書巢

吳澂

食息不離書令尹非蠹魚騰身出巢外編簡不如吾

醯雞瓮裏天露蟬殼外身此巢何處着六合一微

塵

題江州庾樓

賀復孫

宿鳥歸天盡浮雲薄暮開淮山青數點不肯過江來

錢選宮人圖

安熙

露冷月華白悠悠方寸心夫君渺何許悵望碧雲深

市莊

王結

市莊主人踏門徵詩短歌六章用塞雅命其卒章之亂聊示莞爾之謔云躬畊之暇擊壤緩歌抱膝微吟亦足以超然於天壤間也

烏府振弘規鳳閣司婉畫退食休別墅逍遙古樂

國

沃若成都桑爛斑青門瓜隱顯亮殊途高致惟一家

晨鍾趨朝班日盱遊市莊兩兒帶經鋤奔世流芬  
芳  
若人孔氏徒臺閣揚清風休日植杖耘高揖荷蓀  
翁  
城居匪湫隘桑果連畛畦吾廬有高興何必空山  
接  
老我縛塵纓山林渺遐想羨君市有莊取魚兼熊  
掌

節婦黃氏

馬祖常

白日松臺闕青山石椁沉十年哭夫淚下入九泉

過李陵臺

馬祖常

踰林聞野祭漢室議門誅辛苦樓蘭將淒涼太史書

七言絕句

讀汝南遺事

楊奐

軼道牽羊事已非更堪行酒著青衣裏頭婢子那  
知此爭逐君王烈焰歸  
六朝江水故依然隔斷中原又百年長笑桓温無  
遠略竟留王猛佐符堅

明皇擊梧圖

李俊民

不使黎園弟子知太平音在鳳凰枝一朝野鹿御

花去長恨秋風葉落時

過陳司諫墓

劉祁

鸞坡烏府舊遊空三尺孤墳野寺中猶有憂時心

不死墓門昨夜起秋風

瀟湘夜雨

李冶

遠寺孤舟墮渺茫雨聲一夜滿瀟湘黃陵渡口風

波暗多少征人說故鄉

墨海棠

李冶

漠宮愁絕冷煙赦一醮劉郎兩鬢絲甲帳夜寒銀

短六銖雲帳獨來時

征南口號

杜瑛

春早雲南麥已黃瀘江蒸霧水如湯馬蹄半帶陰  
山雪變作人天六月涼

春日雜詠

徒單公履

東風簾幕半塵埃歌舞臺空畫不開試問雙飛新  
燕子今年社日為誰來

登北邙山

楊果

干戈叢裏過壬辰原上纍纍冢墓新寒食清明幾  
家哭問來都是陣亡人

魏家池館姚家宅佳舟而今採作薪水北水南三

二月舊時多少看花人

村居

揚果

草堂有燕賀新成沙渚無鷗續舊盟滿徑落紅風  
掃靜一渠春碧雨添平

春波淡淡捲寒漪長日蕭蕭靜竹扉村舍蠶催桑  
葉大山田鹿食麥苗稀

峴山秋晚圖

揚果

江水江花遶大堤太平歌舞習家池而今風景那  
堪畫落日空城鳥雀悲

太真教鸚鵡圖

馮謂

溫泉賜浴意融怡猶念寧王玉笛吹却怕能言泄  
幽事丁寧慎勿語人知

覃懷春日

趙復

江南江北半浮生蹤跡居然水上萍竹雞啼罷山  
雨黑蠶子生時桑柘青

春晴

劉辰翁

江柳長天草色齊新晴何物不芳菲無因化作千  
胡蝶西蜀東吳款款歸

新燕池塘綠雨肥初晴未暖日光微角巾猶帶花  
梢濕纔倚闌干見絮飛

春浦帆歸圖

孟攀鱗

涵空水色碧於苔  
照眼山光翠作堆  
疑是桃花源  
上客輕舟天外得  
春來

杭州聞角

梁棟

聽徹哀吟獨倚樓  
碧天無際思悠悠  
誰知盡是中  
原恨吹到江南第一州

有懷

劉秉忠

雨過幽庭長綠苔  
東風時為掃塵埃  
無人曾見春  
來處門外桃花只自開

風雨圖

許衡

南山已見霧昏昏  
便合潛身不出門  
直到半途風  
雨橫倉惶何處覓前村

風雨迴舟

風雨來時撥棹迴  
濟川心事有誰知  
停舟且做江  
湖夢浪靜風恬未是遲

水仙花

海上三山壁月明  
人間誰識許飛壇  
秋風吹上青  
鸞背來散天香與素英

明月珠衣翡翠裳  
冰肌玉骨自清涼  
不隨王母瑤  
池去來侍維摩病几傍

當年一線魏瓠穿直到橫流破國年  
草滿金陵誰種下天津橋畔聽啼鶯

卧榻而今又屬誰江南回首見旌旗  
路人遙指降王道好似周家七歲兒

朱張遺學有經綸不是清談誤世人  
白首歸來會同館儒冠爭看宋師臣

風節南朝苦不伸沂流直要到崑崙  
世宗一死千年欠此是黃河最上源

唱徹芙蓉花正開新聲又聽采茶哀  
秋風葉落塔

歌起已覺江南席卷來

山寺早起

劉因

松窻一夜遠潮生斷送幽人睡失明  
夢覺不知春已去半簾紅雨落無聲

讀史評

劉因

紀錄紛紛已失真語言輕重在詞臣  
若將字字論心術恐有無邊受屈人

山行

劉因

西崦人家竹映溪山深雨暗到來遲  
行窮谷口水才見流盡巖花春不知

山家

劉因

馬蹄踏水亂明霞  
醉袖迎風受落花  
怪見溪童出門望  
鵲聲先我到山家

寫真詩卷

劉因

龍祠嶽廟盡冠巾  
雨露何關土木身  
不是二程窮物理  
誰從一髮辨天真

已巳春往均州

宋衙

武當却立翠屏新  
碧玉溶溶漢水奔  
如畫江山千古在  
城闌幾度戰塵昏

觀出獵

宋衙

金鉞染血大街毛  
倒臂蒼鷹掣錦條  
紅日下山秋

塞澗齊歌野樂陣雲高

平原馬首鴈行齊  
狡兔深藏鳥不飛  
環立傳觴人

半醉斜歌貂帽雪中歸

壽陽梅粧圖

王思廉

一聲白鴈度江潮  
便覺金陵王氣銷  
畫史不知亡國恨  
猶將鉛粉記前朝

昭君出塞圖

王思廉

黃沙堆雪暗龍庭  
馬上琵琶掩淚聽  
漢室禦戎無上策  
錯教紅粉怨丹青



汾亭古意圖

張礎

漢家宮闕白雲秋  
魏國川原過鴈愁  
萬古松風一  
茅舍不隨華屋變  
山丘

關山風雨圖

張礎

山氣凝寒雨不開  
江濤拍岸雪成堆  
漁翁慣識風  
波惡天際孤舟已早迴

絕句四首

趙孟頫

春寒惻惻掩重門  
金鴨香殘火向溫  
燕子不來花  
又落一庭風雨自黃昏

湘簾細織浪紋稀  
白苧新裁暑氣微  
庭院日長

客退滿池芳草燕交飛

搖落山川草樹稀  
白雲時逐鴈南飛  
苦無綠酒酬

佳日猶有黃花媚夕暉

梅花半落雪飄零  
楊柳青青江水生  
一夜東風吹

鴈過江南江北總多情

錢選畫花

陳巖

雪翁夙跡老詞客  
亂後却工花寫生  
寓意豈求顏  
色似錢塘風物記昇平

題道院

高克恭

綠陰無際壓蒼苔  
為愛幽深手自栽  
風月早知煩

耳目不教春筍過牆來  
草色琅玕遍兩楹  
蚤陰才過午陰清  
斜陽又送西軒影  
一就移床待月生

無錫山中留題

高克恭

山深自昔無車馬  
道在何曾畏虎狼  
祇恐閑人來看竹  
淋漓醉墨污新墻

即事

高克恭

古木陰中生白烟  
忽從石上見流泉  
閑隨屈曲尋源去  
直到人家竹塢邊

過弋陽

高克恭

雷聲驅雨過山西  
山腹雲根似削齊  
日暮牧兒歸不得  
料應白水漲前溪

過信州

高克恭

二千里地佳山水  
無數海棠官道傍  
風送落紅攬馬過  
春光更比路人忙

過京口

高克恭

北來朋友不如鴻  
幾箇西飛幾箇東  
多少登臨舊臺觀  
闌干閑在夕陽中

寄王總管

李昶

華陽東下古梁州  
五馬旌旗擁上游  
腸斷寒江衣

帶水令人空望鎮南樓  
過故縣垣

憲宗皇帝射臺高氣壓蠻江萬丈濤  
玉輦不歸巖樹冷白雲何處醉蟠桃

杏花始開小酌

安熙

生紅和露滴胭脂又到芳春寂寞時  
便擬提壺花下醉却愁羞殺背陰枝  
杖藜吟遠去還來收拾春光入酒盃  
自是風花要題品等閑蜂蝶莫相猜

和郭安道治書韻

周馳

西風吹起白頭波  
半夜扁舟掠岸過  
不向長橋酌一醉  
滿天明月柰秋何

君醉淋漓我浩歌  
古人爲恨復如何  
秋來幾日渾無賴  
已有新霜着芰荷

江間小艇數能乘  
活計今如船子僧  
近喜老妻能斫膾  
欲令稚子學扳罾

又客思歸歸未能  
題書附與遠遊僧  
吳松江上鱸魚美  
何處人家不下罾

遼陽高節婦

王結

天東長白近蓬瀛  
縹緲仙人玉雪清  
鳳去紫簫聲

已絕青鸞獨跨上瑤京

秋懷

曹元用

沙磧秋高宛馬肥  
哀笳一曲塞雲飛  
南都兒輩應相念  
過盡征鴻猶未歸

贈李祕監

至治間曾  
畫御容

張養浩

封章曾拜殿庭間  
凜凜丰儀肅九關  
回首橋山淚成血  
逢君不忍問龍顏

青山白雲圖

虞集

獨向山中訪隱君  
行窮千澗水  
泐泐仙家更在空  
青外只許人間禮  
白雲

水芙蓉

長洲宮沼醉西施  
蕩漾蘭舟不自持  
願奉君王千歲樂  
一盤清露玉淋漓

木芙蓉

九月襄王燕渚宮  
霓旌翠羽度雲中  
滿汀山雨衣裳濕  
宋玉愁多賦未工

春雲

虞集

春雲冉冉度宮城  
樓雪初融水半生  
行過御溝  
父立舉頭枝上有啼鶯  
雨裏輕塵道半乾  
朝迴隨處借花看  
牆東半樹垂

揚柳飛絮時來近馬鞍

又立聽雨

虞集

屏風圍暖鬢穆穆絳蠟搖光照暮酣京國多年情  
盡改忽聽春雨憶江南

何處它年寄此生山中江上總關情無端繞屋長

松樹盡把風聲作雨聲

庚午廷試次韻

待漏宮門聽鑰開袖中進卷總賢才奏名殿裏千

花合傳勅階前好雨來

千花覆檻柳垂絲晝刻傳呼淑景移聖主自觀新

進策侍臣簪筆立多時

曹將軍馬

虞集

高秋風起玉關西踣鐵歸朝十萬蹄貌得當時第  
一疋昭陵風雨夜聞嘶

寄家書

馬祖常

春雲閣雨花泥少池上波平飛白鳥薊中河外盡  
天涯蓮葉圓時身到家

馬祖常

九曲珠穿蟻度絲雙環鏡透月輪虧人間自有鸚  
鸞侶早奏簫韶見鳳儀

宮詞

馬祖常

華清水殿繡芙蓉金鬪香銷寶帳重竹葉羊車來  
別院何人空聽景陽鍾

銀床井冷露溽溽半臂薰衣釧辟寒不恨長門冬  
夜永小奴休報鞞羅單

長門月轉漏聲催自熨寒衣減帶圍休怕官家嫌  
體弱細腰曾是楚王妃

合宮舟泛濯龍池端午爭懸百綵絲新賜承恩脂  
粉磴上陽不敢妬蛾眉

繭館綵絲濕翠翹夫人織指織龍綉羅襦雙珮清

晨響只恐君王有晏朝

八姨粉翠錫千緡脂盃新粧百寶勻白髮上陽宮  
女老補衣重拆繡麒麟

卯酒微微解宿醒催花羯鼓報新聲君王好錫承  
恩宴辛苦邊頭百將營

露蘭研粉壽陽粧奩內新燒百刻香圓舌教成鸚  
鵡語偷將玉笛送寧王

銀河七夕渡雙星桐樹逢秋葉未零萬歲君王當  
守坐妾身不願命如萍

花氣蒸霞淑景明望仙樓上看彈鸞李暮吹笛宮

墻外學得黎園第一聲

孟光舉案圖

王執謙

白髮梁鴻與世乖  
賴逢光也配其才  
五噫歌罷愁無奈  
不覺春從案上來

題甄氏訪山亭

陳觀

水流花落石生雲  
日靜風喧草欲薰  
老去風流猶未減  
一丘一壑要平分

雨後西山翡翠堆  
結亭直欲近巖隈  
從今記取溪頭路  
一日須來一百迴

清明日遊太傅林亭

辛文房

隔水園林丞相宅  
路人猶記種花時  
可憐總被風吹盡  
不許遊人折一枝

玉簪

張淳

開軒俯瞰碧雲衢  
白筆含香半吐鬚  
帶露折來何處可  
膽瓶秋水澹如無

過郝參政墓林

鮑仲華

茂林喬梓上千雲  
葉葉曾沾雨露恩  
萬古西山青不斷  
鳥啼花落幾黃昏

元文類卷第八

元文類卷第九

詔赦

即位詔

庚申年四月

朕惟祖宗肇造區宇奄有四方武功迭興文治多闕五十餘年於此矣蓋時有先後事有緩急天下大業非一聖一朝所能兼備也

先皇帝即位之初風飛雷厲將大有為憂國愛民之心雖切於已尊賢使能之道未得其人方董夔門之師遽遺鼎湖之泣豈期餘恨竟弗克終肆予冲人渡江之後蓋將深入焉乃聞國中重以僉軍



之擾黎庶驚駭若不能一朝居者予爲此懼駟騎  
馳歸目前之急雖紓境外之兵未戢乃會羣議以  
集良規不意宗盟輒先推戴左右萬里名王巨僚  
不召而來者有之不謀而同者皆是咸謂國家之  
大統不可久曠神人之重寄不可暫虛求之今日  
太祖嫡孫中先皇母弟之列以賢以長止予一  
人雖在征伐之間每存仁愛之念博施濟衆實可  
爲天下主天道助順人謨與能祖訓傳國大典於  
是乎在孰敢不從朕峻辭固讓至于再三祈懇益  
堅誓以死請於是俯徇輿情勉登大寶自惟寡昧

屬時多艱若涉淵冰罔知攸濟爰當臨御之始宜  
新弘遠之規祖述變通正在今日務施實德不尚  
虛文雖承平未易遽臻而飢渴所當先務略舉其  
切時便民者條列於后嗚呼歷數攸歸欽應上天  
之命勲親斯託敢忘烈祖之規建極體元與民更  
始朕所不逮更賴我遠近宗族中外文武同心協  
力獻可替否之助也誕告多方體予至意

中統建元詔

王鶚

祖宗以神武定四方淳德御羣下朝廷草創未逞  
潤色之文政事變通漸有網維之目朕獲續舊服

載擴丕圖稽 列聖之法規講前代之定制建元表  
歲示人君萬世之傳紀時書王見天下一家之義  
法春秋之正始體六易之乾元炳煥皇猷權輿治  
道可自庚申年五月十九日建號為中統元年惟即  
位體元之始必立經陳紀為先故內立都省以總  
權綱外設總司以平庶政仍以興利除害之事補  
偏抹弊之方隨詔以頒申盡于后於戲秉錄握捥  
必因時而建號施仁發政期與物以更新敷宣懇  
惻之辭表著憂勞之意凡在臣庶體予至懷

中統元年五月赦

王鶚

我國家

烈祖肇基 先皇繼統惟圖日闢於疆宇未免歲  
耀於兵威事有當為時難遽已朕獲承丕祚已降  
德音念士卒暴露者久之而人民離散者多矣千  
戈載戢田里俾安不期同氣之中俄有閱墻之侮  
顧其冲幼敢啓茲謀皆被姦讒相濟以惡彼既階  
於禍亂此當應以師徒朕惟 父母兄弟之親 宗  
廟社稷之重遣使敦諭至于再三亂紀執迷曾無  
少革以致宗族共怒戈甲乃興重念兵方弭而復  
徵民甫休而再擾危疑未釋反側不安註誤者至

及於無辜拘囚者或生於不測非朕本意蓋然傷  
心宜推曠蕩之恩普示哀矜之意於戲悛心或啓  
忍加管蔡之刑內難既平迺續成康之治

賜高麗國王曆日詔中統五年正月王鶚

諭高麗國王植獻歲發春式邁三陽之會對時  
育物宜同一視之仁睠爾外邦忠於內附肇因正  
旦庸展賀儀方使介之還歸須筴書之播告今賜  
卿中統五年曆日一道卿其若稽古典敬授民時  
勸彼東嶠之民勤於南畝之事茂迎和氣迄用康  
年時乃之休惟朕以懌

至元改元赦中統五年八月  
王鶚

應天者惟以至誠拯民者莫如實惠朕以菲德獲  
承慶基內難未戡外兵弗戢夫豈一日于今五年  
賴天地之昇矜暨祖宗之垂裕凡我同氣會  
于上都雖此日之小康敢朕心之少肆比者星芒  
示儆雨澤愆常皆闕政之所繇顧斯民其何罪宜  
布惟新之令溥施在宥之仁於戲否往泰亦迺續  
亨嘉之會鼎新革故正資輔弼之良

建國號詔至元八年  
徒單公履

誕膺景命奄四海以宅尊必有美名紹百王而紀

統肇從隆古匪獨我家且唐之爲言蕩也堯以之  
而著稱虞之爲言樂也舜因之而作號馴至禹興  
而湯造互名夏大以殷中世降以還事殊非古雖  
乘時而有國不以義而制稱爲秦爲漢者蓋從初  
起之地名曰隋曰唐者又即始封之爵邑是皆徇  
百姓見聞之狃習要一時經制之權宜槩以至公  
無少貶我

太祖聖武皇帝握乾符而起朔土以神武而膺帝  
圖四振天聲大恢土宇輿圖之廣歷古所無頃者  
耆宿詣庭奏章伸請謂既成於大業宜早定於鴻

名在古制以當然於朕心乎何有可建國號曰大  
元蓋取易經乾元之義茲大治流形於庶品孰名  
資始之功予一人底寧於萬邦尤切體仁之要事  
從因革道協天人於戲稱義而名故匪爲之溢美  
孚休惟永尚不負於投艱嘉與敷天共隆大號

頒授時曆詔

至元十七年六月

李謙

自古有國牧民之君必以欽天授時爲立治之本  
黃帝克舜以至三代莫不皆然爲日官者皆世守  
其業隨時考驗以與天合故曆法無數更之弊及  
秦滅先聖之術每置閏於歲終古法蓋殫廢矣由

兩漢而下立積年日法以為推步之準因仍沿襲以迄于今夫天運流行不息而欲以一定之法拘之未有久而不差之理差而必改其勢有不得不然者今命太史院作靈臺制儀象日測月驗以考其度數之真積年日法皆所不取庶幾脗合天運而永終無弊乃者新曆告成賜名曰授時曆自至元十八年正月一日頒行布告遐邇成使聞知

清冗職詔

至元二年七月十日

李謙

惟我

祖宗肇造區夏雖中書已嘗建立而官制未暇舉

行迨予圖大以宅中思欲繼志而述事集儒臣之公議法前代之彛章爰立省部院臺以正朝廷綱紀自疆土極照臨之遠而省臺有內外之分日益月增官冗人濫嘗勅有司而澄汰意能舊制之遵承比聞近侍之言謂益曩時之弊彼不勝重任有壅上聞苟尚蹈匪彛時惟予咎其清冗職用復前規於戲官不必備惟其人朕恪守已成之憲爾尚克勤于乃事卿永肩圖報之心

加封五嶽四瀆四海詔

至元二年二月十日閣復

朕惟名山大川國之祗祀今嶽瀆四海皆在封宇

之內民物阜康時惟神休而封號未加無以昭答  
靈貺可加上東嶽爲天齊大生仁聖帝南嶽司天  
大化昭聖帝西嶽金天大利順聖帝北嶽安天大  
貞玄聖帝中嶽中天大寧崇聖帝加封江瀆爲廣  
源順濟王河瀆靈源弘濟王淮瀆長源溥濟王濟  
瀆清源善濟王東海 廣德靈會王南海廣利靈  
孚王西海廣潤靈通王北海廣澤靈祐王仍各遣  
官詣祠致告以稱朕敬恭神明之意

興師征江南諭行省官軍詔 王構

爰自

太祖皇帝以來彼宋與我使介交通殆非一次彼  
此曲直之事亦所共知不必歷舉迨我  
憲宗之世朕以藩職奉命南伐師次鄂渚彼賈似  
道遣宋京詣我近臣博都歡前河南路經略使趙  
壁請罷兵息民願奉歲幣于我朕以國之大事宗  
親在上必須入計用報而還即位之始追憶是言  
乃命翰林侍講學士郝經等奉書往聘蓋爲生靈  
之計也古者兵交使在其間惟和與戰宜嗣報音  
其何與於使哉而乃執之卒不復命至報畱此一  
二行李於此何損於彼何益以致師出連年邊境

之間死傷相籍係累相屬皆彼宋自禍其民也襄陽被圍五年旅拒王師義當不貸朕先有成命果能出降許以不死是既降附之後朕不食言悉全其命冀宋悔過或啓令圖而乃迷執罔有悛心所以問罪之師有不能已者今遣爾等水陸並進爾等當布告遐邇夫以天下爲事爰及干戈自古有之無辜之民初無與焉若彼界軍民官吏人等去逆效順與衆來降或別立奇功者驗等第官資遷擢其所附軍民宜嚴勅將士毋得妄行殺掠父母妻孥家口毋致分散仍加賑給令得存濟其或固

拒弗從及迎敵者俘戮何疑

即位詔

至元三十一年四月

王構

朕惟

太祖聖武皇帝受

天明命肇造區夏

聖聖上

承光熙前緒迨我

先皇帝體元居正以來然後典章文物大備臨御三十五年薄海內外罔不臣屬宏規遠略厚澤深仁有以衍皇元萬世無疆之祚我昭考早王儲位德盛功隆天不假年四海缺望顧惟眇質仰荷先皇帝殊眷徃歲之夏親授皇太子寶付以梅軍

之任今春宮車遠馭奄棄臣民乃有宗藩昆第之  
賢戚曉官僚之舊謂祖訓不可以違神器不可  
以曠體承先皇帝夙昔付託之意合辭推戴誠  
切意堅朕勉徇所請於四月十四日即皇帝位尚  
念先朝庶政悉有成規惟慎奉行罔敢失隊更  
賴宗親勲戚左右忠良各盡乃誠以輔台德

五鎮山加封詔大德三年 王構

朕惟九州之有鎮山三代以為常祀嶽瀆四海加  
封爰自于先朝疆理羣方同饗宜遵於舊制乃眷  
粹靈之懿其增號秩之華今加上東鎮沂山曰元

德東安王南鎮會稽山曰昭德順應王西鎮吳山  
曰成德永靖王北鎮盤巫閭山曰貞德廣寧王中  
鎮霍山曰崇德應靈王地德恒安功協成于奄奠  
民生成阜治浸格于隆平仍命所在有司以時致  
祭務盡精嚴尚冀歆承益孚嘉貺

建儲詔大德九年 閻復

惟我

太祖聖武皇帝

世祖聖德神功文武皇帝規模宏遠預建儲嗣式  
與古合朕恪遵祖宗成憲允協昆弟僉言立嫡



子德壽為皇子茲有日矣比者遠近宗親復以為  
請又中書百司及諸老臣請授冊寶昭示中外朕  
俯從衆願於今日五日授以皇太子寶所有冊禮  
其如常制屬茲盛舉宣布新恩於戲慶衍無疆既  
正名於國本仁同一視尚均福於黎元

即位詔

大德十一年五月

闕後

昔我

太祖皇帝以武功定天下  
世祖皇帝以文德洽海內列聖相承丕衍無疆之  
祚朕目先朝肅將天威撫軍朔方殆將十年親御

甲冑力戰却敵者屢矣方諸蕃內附邊事以寧遽  
聞宮車晏駕迺有宗室諸王貴戚元勳相與定策  
於和林咸以朕為

世祖曾孫之嫡 裕皇正派之傳以功以賢宜膺

大寶朕謙讓未遑至于再三還至上都宗親大臣

復請於朕間者姦臣乘隙謀為不軌賴 祖宗之

靈母弟愛育黎拔力八達稟命 太后恭行天罰

內難既平神器不可久虛 宗祧不可乏祀合辭

勸進誠意益堅朕勉徇輿情於五月二十日即皇帝

位任大守重若涉淵冰屬嗣服之云初其與民而

更始於戲丕承丕顯敢忘持守之心于蕃于宣勉效忠勤之力共毗新政聿辰隆平

行銅錢詔

至大二年十月

錢幣之法其來遠矣三代以降沿革不常計大歷世祖皇帝建元之初頒行交鈔以權民用已有錢幣兼行之意蓋錢以權物鈔以權錢子母相資信而有證今鈔法一新期於公私兩利重惟經久之計必復鼓鑄之規

至大三年十月赦

姚燧

朕自嗣守丕基致孝

太室奉上玉冊寶加謚

太祖為法天啓運聖武皇帝光獻翼聖皇后

睿宗仁孝景襄皇帝顯懿莊聖皇后

世祖聖德神功文武皇帝昭睿順聖皇后

裕宗文惠明孝皇帝徽仁裕聖皇后

順宗昭聖衍孝皇帝

成宗欽明廣孝皇帝貞慈靜懿皇后于斯之時宜降德音誕告天下猶恐數赦或賊良民今因西北叛王不受正朔五十餘年其子察八而蓋愆前人盡率部衆歸命闕庭及闕闕出謀為非覲未忍置理刑以輕典與夫崇建大刹上為列聖報德冥

冥下為生民祈福昭昭者亦既成功皆我聖母  
之德之致已於此月五日奉玉冊玉寶上尊號曰  
儀天興聖慈仁昭懿壽元皇太后屬大慶禮成宜  
敷渙號以新民聽於戲九在有司一乃心力以輔  
予治期底隆平

即位詔 至大四年  
三月

姚遂

惟昔先帝事

皇太后撫朕眇躬孝友天至由朕同託

順考遺體重以母弟之嫡加有削平內難之功於  
其踐阼曾未踰月授以皇太子寶願中書令樞密

使百揆機務聽所總裁于今五年先帝奄棄天  
下勲戚元老咸謂大寶之繩既有成命非與  
前聖賓天而始徵集宗親議所宜立者比當稽周  
漢晉唐故事即正宸極朕以國恤方新誠有未忍  
是用經時今則上奉皇太后勉進之命下徇諸  
王勸戴之勤三月十八日於大都大明殿即皇帝  
位凡尚書省誤國之臣先已伏誅同惡之徒亦已  
放殛百司庶政悉歸中書命丞相鐵木迭兒平章  
政事完澤李道復等從新極治其可為今法程極  
民急者具如左方於戲九爾有官君子皆古所謂

治天職食天祿者宜一心力欽乃攸司無替朕命  
行科舉詔皇慶二年十一月程鉅夫

惟我祖宗以神武定天下  
世祖皇帝設官分職徵用儒雅崇學校為育才之  
地議科舉為取士之方規模宏遠矣朕以眇躬獲  
承丕祚繼志述事祖訓是式若稽三代以來取  
士各有科目要其本末舉人宜以德行為首試藝  
則以經術為先詞章次之浮華過實朕所不取爰  
命中書參酌古今定其條制其以皇慶三年八月  
天下郡縣與其賢者能者充賦有司次年三月會

試京師中選者朕將親策焉於戲經明行修庶幾  
真儒之用風移俗易益臻至治之隆

即位詔  
三月 延祐七年

張士觀

洪惟

太祖皇帝膺期撫運肇開帝業

世祖皇帝神機睿略統一四海以聖繼聖迨我  
先皇帝至仁厚德涵濡羣生君臨萬國十年于茲  
以社稷之遠圖定天下之大本協謀宗親授予冊  
寶方春宮之與政遽昭考之賓天諸王貴屬元  
勲碩輔咸謂朕宜體先皇帝付託之重

皇太后擁佑之慈既深繫於人心詎可虛於神器  
合辭勸進誠意交孚乃於三月十一日即皇帝位  
於大明殿誕受惟新之命庸推在宥之恩尚念  
祖宗丕緒持守維艱萬幾之繁罔敢暇逸更願遠  
近勲戚左右臣鄰咸一乃心以輔予治

至治改元詔

元明善

朕祗適詒謀獲承丕緒念付託之惟重顧繼述之  
敢忘爰以延祐七年十二月初二日被服袞冕恭  
詣于太廟既大禮之告成宜普天之均慶屬茲  
踰歲用易紀元予以導天地之至和予以法春秋

之謹始可改延祐八年為至治元年於戲奉先以  
孝式昭報本之誠發政施仁聿廣錫民之福

命拜住為右丞相詔

至治二年十二月

袁楠

帝王之職在論一相予以表正百司綱領庶績

不丕緒屬精圖治然而澤有所未洽政有所未

豈委任之道有遺闕歟今特命中書左丞相拜

開府儀同三司上柱國錄軍國重事中書右

丞相監修國史一新機務使邪正異途海寓乂寧

以復中統至元之治於戲朝廷既正著端本澄源

之功風俗斯醇廣摩義漸仁之化

諭安南國詔

曹元用

諭安南國世子陳日曠我國家誕膺景命撫綏萬邦德澤普加靡間夷夏乃者先朝奄棄臣民朕以裕皇嫡孫為宗戚大臣之所推戴爰自

太祖皇帝肇基之地入承天叙於至治三年九月四日即皇帝位遂以甲子歲為泰定元年今遣亞中大夫吏部尚書馬合謀奉議大夫禮部郎中楊宗瑞賚詔往諭爾國賜爾授時曆一帙惟乃祖乃父脩貢內附有年矣我國家遇卿甚厚以占城守臣上表稱卿之邊吏累發兵相侵朕為之惻然于

中不知卿何為至是豈信然耶朕君臨天下視遠猶邇務輯寧其民俾各得其所卿其體予至懷戒飭士衆慎保乂民俾毋忘爾累世忠順之意

即位改元詔

虞集

洪惟我

太祖皇帝肇造區夏

世祖皇帝混一海宇爰立定制以一統緒宗親各授分地勿敢妄生覬覦此不易之成規萬世所共守者也

世祖皇帝之後 成宗皇帝 武宗皇帝 仁宗

皇帝英宗皇帝以公天下之心以次相傳宗王  
貴戚咸遵祖訓至於晉邸具有盟書願守藩服而  
與賊臣帖失也先帖木兒等潛通陰謀冒干寶位  
使英皇不幸罹于大故朕兄弟播越南北備歷  
艱險臨御之事豈獲與聞朕以叔父之故順承惟  
謹于今六年災異迭見權臣倒刺沙烏伯都刺等  
專擅自用疏遠勳舊廢棄忠良變亂祖宗法度空  
府庫以私其黨類大行上賓利於立幼顯握國柄  
用成其姦宗王大臣以宗社之重統緒之正協謀  
推戴屬于眇躬朕以菲德宜俟大兄固讓再三宗

廟制相百僚耆老以爲神器不可以久虛天下不  
可以無主周王遼隔朔漠民庶遑遑已及三月誠  
懇迫切朕姑從其請謹俟大兄之至以遂朕固讓  
之心已於致和元年九月十三日即皇帝位於大  
明殿其以致和元年爲天曆元年可大赦天下於  
戲朕豈有意於天下哉重念祖宗開創之艱恐  
隳大業是以勉徇輿情尚賴爾中外文武臣僚協  
心相予輯寧億兆以成治功

即位詔

天曆二年八月十五日

虞集

惟昔上天啓我

太祖皇帝肇造帝業 列聖相承

世祖皇帝既大一統即建儲貳而我

裕皇天不假年 成宗入繼才十餘載我 皇考

武宗皇帝歸膺大寶克享天心志存不私以

仁廟居東宮遂嗣宸極甫及 英皇降割我家晉

邸違盟構逆據有神器天示譴告竟隕厥身於是

宗戚舊臣協謀以舉義正名以討罪揆諸統緒屬

在眇躬朕與念大兄播遷朔漠以賢以長曆數宜

歸力拒羣言至于再四乃曰艱難之際天位乂虛

則衆志弗固恐隳大業朕雖從請而臨御秉初志

之不移是以固讓之詔始頒奉迎之使已遣尋命

阿納忒納失里燕帖木兒奉皇帝寶璽遠迓于途

受寶即位之日即遣使授朕皇太子寶朕幸釋重

負實獲素心乃率臣民北迎大駕而 先皇帝跋

涉山川蒙犯霜雪道里遼遠自春徂秋懷艱阻於

歷年望都邑而增慨徒御弗慎屢爽節宣信使往

來相望於道路彼此思見交切於衷懷八月一日

大駕次王忽察都朕欣瞻對之有期獨兼程而先

進相見之頃悲喜交集何數日之間而宮車弗駕

國家多難遽至於斯念之痛心以夜繼旦諸王大



臣以為祖宗基業之隆先帝付託之重天命所在誠不可違請即正位以安九有朕以先皇帝奄棄方新摧怛何忍銜哀辭對固請彌堅執誼伏闕者三日皆宗社大計乃以八月十五日即皇帝位于上都可大赦天下於戲戡定之餘莫急于與民休息丕變之道莫大乎使民知義亦惟爾中外大小之臣各究乃心以稱朕意

親祀南郊赦

至順元年十二月

虞集

朕膺昊天之成命承聖祖之貽謀祇續丕基于今三載統萬幾兢業思兆姓之雍熙式舉禮文聿

嚴報祀爰以今年十月初四日躬服袞冕致明禋于南郊尊我

太祖法天啓運聖武皇帝配享上帝方至誠之孚格嘉景貺之旋臻宜施曠蕩之恩用洽溥天之慶於戲永言配命克肩昭事之心一視同仁益廣鴻寧之福

即位詔

虞集

洪惟

太祖皇帝啓闢疆宇

世祖皇帝統壹萬方列聖相承法度明著我

曲律皇帝入纂大統修舉庶政動合成法授大寶  
位于普顏篤皇帝以及格堅皇帝曆數之歸  
寔當在我忽都篤皇帝扎牙篤皇帝而各播  
越遼遠時則有若燕帖木兒建義效忠戡平內難  
以定邦國協恭推戴扎牙篤皇帝登位之始即  
以讓兄之詔明告天下隨奉璽統遠迓忽都篤  
皇帝朔方言旋奄棄臣庶扎牙篤皇帝荐正宸  
極仁義之至視民如傷恩澤霽霽無間遠邇顧育  
眇躬尤篤慈愛賓天之日皇后侍扎牙篤皇帝  
顧命於太師太平王右丞相答剌罕燕帖木兒太

保浚寧王知樞密院事伯顏等謂聖體彌留益推  
因讓之初志以宗社之重屬諸大兄忽都篤皇  
帝之世嫡乃遣使召諸王宗親以十月一日來會  
大都與宗王大臣同奉遺詔揆諸成憲宜御神器  
以至順三年十月初四日即皇帝位于大明殿可  
大赦天下於戲肆予沖人託于天下臣民之上任  
大守重若涉淵冰尚賴宗王大臣百司庶府交修  
乃職思盡厥忠嘉與億兆之民共保隆平之治

元文類卷第十

冊文

皇后冊文

維至元十年歲次癸酉三月甲寅朔十三日丙寅  
皇帝若曰天地合德故能覆載萬物而不遺日月  
並明所以照臨六合而無外至哉夫婦之大義實  
配陰陽之兩儀咨爾皇后弘吉烈氏戚里名家元  
勲貴族備儀率禮令德來嬪自朕奉藩之初至于  
踐阼之日明識遠慮裨益宏多雖禕翟正位于長  
秋而典冊未光于大禮茲者文臣敷奏寔應朕心

今遣攝太尉中書右丞相安童持節授爾玉冊寶  
章備物充庭式遵古典於戲恭順接下九族形雍  
睦之風儉素相高萬世衍靈長之福服茲寵命益  
懋徽猷

皇太子冊文合而無不至若夫徒單公履

皇帝若曰咨爾皇太子

裕宗廟諱

仰惟

太祖聖武皇帝遺訓嫡子中有克嗣服繼統者預  
選定之是用立

太宗英文皇帝以紹隆丕構自時厥後不為顯立  
冢嫡遂啓爭端朕

祖宗弘遠之規下協昆弟

僉同之議乃從燕邸立爾為皇太子積有日矣比  
者儒臣敷奏國家定立儲嗣宜有冊命此典禮也  
今遣攝太尉中書左丞相伯顏持節授爾玉冊金  
寶於戲聖武燕謀爾其奉承昆弟宗親爾其和協  
使仁孝顯於躬行可謂不負爾所託矣尚其戒哉  
式勿替朕命

太祖皇帝加上尊號冊文王構

維至大二年歲次己酉某月某日孝曾孫嗣皇帝  
臣某謹再拜稽首言伏以恢皇綱廓帝紘建萬世  
無疆之業鋪宏休揚偉績遵累朝已定之規式當

繼統之元盍有稱天之誅孝弗忘于率履制庸謹  
于加崇欽惟  
太祖聖武皇帝陛下淵量聖姿睿謀雄斷沛仁恩  
而濟屯厄振羈策以馭豪英惟解衣推食于初年  
見君國子民之大略玄符顓握諸部悉平黃鉞載  
麾百城隨下裔土兼收于夏孽餘波克殄于金源  
蕩蕩乎無能名迹遠追于湯武灝灝爾其爲訓道  
允協于唐虞根深峻嶽而維者四焉囊括殊封而  
統之一也肆予小子承此丕基兩祗見於太宮恒  
儉臨于端宸祚垂鴻兮錫裕尚期昭報之申牒錢

王以增輝敢緩彌文之舉謹遣某官某奉玉冊玉  
寶加上尊謚曰

法天啓運聖武皇帝廟號 太祖伏惟威靈昭假  
景貺潛臻闡繹吾元與天並久

世祖皇帝謚冊文

王構

維至元三十一年歲次甲午五月庚戌朔越九日  
戊午孝孫嗣皇帝臣某再拜稽首言臣聞繼志述  
事非盡孝無以致其誠表行誅功非定謚無以稱  
其實肆邦彛之具舉維天道之協從欽惟  
先皇帝膺錄受圖體元立統蚤從藩邸茂著徽稱

爲治之基有常經國之畧則遠役用衆智獨斷于  
東總攬萬機如指諸掌內朝廷外侯牧等威迭降  
罔不適中先教化後刑名本末相循亦皆有序在  
御迨踰於三紀推尊合冠於百王若夫惠及困窮  
恩加降附慎終如始每存好仁之心保小以仁特  
示包荒之量擴盛猷之鴻罔沛膏澤之醇釀方其  
泰運漸亨戢濟多難離網復綴混一四方傳檄而  
氛祲開渙號而方維定乾旋坤轉不足以喻其機  
雷厲風飛不足以比其捷至於嘉言博采惟典謨  
訓誥是師諸藝畢延盡陰陽圖緯之學考音律以

創字畫參古今以制禮儀振耀威靈肅陳兵衛白  
旄黃鉞時則親巡犀甲雕弧止於不用其聖德弗  
可及已神功茂以尚焉蓋文之所加者深武之所  
服者大是用升崇吉祔揆卜剛辰謹遣攝太尉臣  
兀都帶奉冊寶上尊謚曰  
聖德神功文武皇帝廟號  
世祖伏惟睿靈俯垂  
昭鑒思皇多祐錫羨無疆

皇太后冊文

陳儼

維至元三十一年歲在甲午十一月丁未朔  
皇帝臣某謹稽首再拜言曰臣聞自家而國治道

必有所先立愛惟親君德莫加於孝况恩深於鞠  
我而禮重於正名歷代以來今儀可考人子之職  
所在天下之母宜尊恭惟

聖母聖善本乎天資靜專法乎地道上以奉宗祏  
之重下以叙倫紀之常助我前人守卷耳憂勤之  
志保予冲子成思齊雖肅之風肆神器之有歸知  
孫謀之素定界付雖由於曆數規模一出於庭闈  
是用率籲衆心章明鉅慶不勝拳拳大願謹奉冊  
寶上尊稱曰

皇太后伏惟長信穆穆周宗綿綿脩洛書之錫福

繫慈極之儀天瑤圖寶運於萬斯年誠歡誠抃  
首再拜

睿宗皇帝加上尊謚冊文

劉賡

伏以詣泰壇而請命有稱天以誅之文薦清廟而  
致嚴蓋若昔相承之典剛辰爰卜遺美載揚欽惟  
睿宗景襄皇帝孝友溫恭聰明溥哲屬我家肇造  
于朔土佐聖祖遄征于四方逮天討之奉行致皇  
威之遠暢金滌馘兩河之息天水渝通好之盟遂  
移秦隴之師爰有褒斜之舉既平南鄭順流而東  
再涉襄江自上而下乃眷三峯之捷實開萬世之

基唇既亡而齒亦寒號可伐而虞不臘適英文之  
遠豫圖中夏之底寧母作神羞請以身代爰俟金  
騰之啓已知寶祚之歸迪我後人紹茲明命徽稱  
顯號雖已擬諸形容玉檢金泥尚未遑於潤色奉  
玉冊玉寶加上尊謚曰  
仁聖景襄皇帝廟號睿宗伏惟端臨宸座誕受  
鴻名億萬斯年永錫繁祉

順宗皇帝謚冊文

程鉅夫

孝子嗣皇帝臣某謹再拜稽首言曰臣聞顯親所  
以爲子追遠所以厚民矧必百世祀而位弗隆爲

天子父而養弗逮是宜稱秩以達純誠欽惟

皇考皇帝淵穆有容神明莫測文孫文子鍾至愛  
於兩宮宜君宜王膺具瞻於四海當璧之祥未卜  
棄蹤之跡已遙興言欲報之恩昊天罔極對越有  
成之命夙夜惟寅昭哉玄德之升聖矣生知之異  
衍莫衍於昌後嗣而有天下孝莫孝於配前烈而  
茂本支念茲繼體之初益切中心之慕謹遣攝太  
尉某官某奉玉冊玉寶上尊謚曰

昭聖衍孝皇帝廟號順宗伏惟明明降鑒序于  
祖宗攸躋攸寧永錫祚胤



維皇慶二年歲次癸丑三月辛卯朔越十有六日

丙午御其奉玉冊玉寶上尊壽曰

皇帝若曰朕荷天地祖宗之祐  
皇太后之訓嗣大歷服思底于治必立元配表正  
六宮咨爾弘吉刺氏寔我家世戚嫡嗣所自出積  
德流慶肆啓爾來嬪于朕淑慎孝恭令譽昭聞承  
命慈闈爰正爾位今遣攝太尉中書右丞相禿忽  
魯授爾玉冊玉寶命爾為皇后惟天地定位萬物  
以生日月並照萬國以明君后合德萬化以成上以

事上帝奉宗廟下以親九族正萬邦為朕內助

惟爾之賢其永念厥德履中體順俾聖母暨子一

人以寧豈惟爾嘉天亦永相念爾共享有國欽哉

皇帝尊號玉冊文

姚燧

維至大二年正月乙酉朔越七日辛卯皇太子中

書令樞密使臣某謹率中外文武百僚頓首頓首

謹言皆我

世祖既平炎趙質之於書幅負廣長振古無倫覆

燾之下八紘萬國莫敢不庭何獨一王西北岸然

憑道阻脩方命正朔德綏之而不摯威董之而不

訾夫豈不能聲罪致罰深入其地終以聖仁親其  
宗親包荒有年成宗繼序憤久驚頑天鑒昭明  
於下裕皇孫獨異陛下授以

太祖皇帝信寶撫軍漠北是固以張足付神器之  
本時未及冠承命即行其視萬里莽閒寒冽之鄉  
不遠不難如堂適庭至則獎厲諸軍脩明法制簡  
拔果毅均苦分勞解衣煖寒推食飫飢泚泚  
士氣日作睿筭伐謀待寇歲至奪人以先身踐戎  
行霆馳電擊大北其羣虜已不矜日慎一日始終  
十年不狃屢勝狂狡不懲悉銳來加當以選鋒伺

間出奇盡襲輜重彷彿無歸度不能軍老倪纍纍  
降口百萬致茲牧寧平四十年未靖之梗成兩  
祖宗未究之志天下之人聞其風聲思覩天光者  
顛顛翹翹九圍一心握是乾符歸正宸極弛武事  
之夙習洽新化以文治立愛自親曾未旬浹上尊  
太后問安以時下建儲宮庶政是先又舉列聖  
未遑之典欽崇元祀玉瓚黃流薦裸太室還蹕龍  
興徘徊

太祖龍旂九旒勸金于斯肇基帝業為城中都又  
以孔子垂範百王將二千年而顯謚未稱加大成

於至聖文宣王上立勞于軍與九庭臣悉大賚之  
間歲不登既賑既恤虞施未博民罹罪罟再肆大  
宥至德難名赫赫巍巍惟天為大掛一漏萬井觀  
如斯求可盡臣下歸美報上者惟是微稱謹奉玉  
冊玉寶上尊號曰

統天繼聖欽文英武大章孝皇帝欽惟

陛下立心天地立極生民茂對鴻名于億萬年

皇太后尊號玉冊文

姚燧

維至大三年歲次庚戌冬十月甲辰朔越五日戊  
申嗣皇帝臣某臣伏思

顯考順宗未臨海寓眇眇小子託其遺體顧踐丕  
基惟事聖母養以天下何無不有何欲不臻而  
隆名盛典辭未見俞非臣所以表微忱酬大德也  
欽惟

皇太后陛下貞順而齊肅淵括而剛明居常處變  
愛威異施臣在先朝受詔漠北往撫諸軍可謂遠  
役以義割恩縱史其行迨軻河陽永懷彌切親至  
五臺禱于佛乘尚憑陰騭早遂振旂殿閣是崇霧  
旣用昭旋聞國恤併日馳赴邪謀方興授策儲皇  
曾不再日掃清宮掖待臣以來畀付神器自非膺

斷安救內訌往歲鑿輅再軌五臺淨供大脩以畢  
夙願極心為臣天壽地持日居月諸其大其明非  
言所喻詩之言曰母氏劬勞推之眇未啗仁煦慈  
百倍為艱圖以報塞惟崇顯號者強而名之庶幾  
聖德昭明天下是用類于  
上帝裡于太室奉玉冊玉寶上尊號曰  
儀天興聖慈仁昭懿壽元皇太后欽惟  
皇太后陛下慶躋莫上之尊福衍無疆之曆菲躬  
是保慈訓是承

皇太子冊文

閻復

皇帝若曰  
祖宗聖緒恭承丕顯之謨兄弟  
正元良之號立天下之大本示天下以至公咨  
皇太子仁廟御名德器淵深英姿玉粹武奮清宮之偉  
績文參定策之殊勲豈特華萼交輝之情式相好  
矣其在鳧鷖守成之治湏汝贊之故於連枝同氣  
之間付以監國撫軍之任茲上承於  
母意蓋允出  
於朕心已於六月朔旦面授爾皇太子金寶今復  
遣攝太尉丞相塔思不花持節授爾玉冊維寵命  
之荐膺尚謙恭而自牧益盡寧親之孝益勤事上  
之忠以敦九族內睦之風以衍億祀無疆之慶

成宗皇帝謚冊文

張士觀

嗣皇帝臣某謹再拜稽首言曰臣聞稱天以誅表名實之至公法日而名庶形容之可擬維帝王之有謚蓋今古之異章欽惟  
大行皇帝稟上聖之資撫重熙之運當  
裕考龍升之後承

世皇燕翼之謀武威肅鎮於遐荒文德誕敷於華夏業業謹盈成之戒愉愉盡孝敬之誠罷勤遠之兵邊釁弭而苗頑格遣直指之使皇澤宣而民瘼除九族形敦睦之風萬國洽隆平之治爰酌奉常

之儀用昭告祔之文謹遣攝太尉某官某奉冊寶上尊謚曰

欽文廣孝皇帝廟號 成宗伏惟睿靈在天孚鑒逮下茂膺典冊錫羨邦家

仁宗皇帝謚冊文

張士觀

維延祐七年歲次庚申八月丁未朔粵十日丙辰孝子嗣皇帝臣某謹再拜稽首言臣聞觀其謚而知其行著王者之不稱禋于廟而誄于郊寔邦家之彝典雖天地之大莫能擬議而臣子之情宜極形容爰體至公式揚景鑠欽惟

大行皇帝聰明冠占勇智自天初大德之陟遐生  
內釁於不測乃從潛邸獨運聖謨正神器於幾危  
定乾維而重構豐功盛烈奮立一時偉望英聲揚  
溢四海尋被 武皇之歷試納于大麓以弗迷由  
母弟之懿親膺元良之重寄取法 裕廟憲之道  
隆奉養 東朝因心之孝至及嗣歷服益見猷為月  
恒日升廓昭代文明之治海涵春照推聖人博愛  
之仁至於敦勸農桑不嗜田獵每覆奏於庶獄必  
惻怛於宸衷肇設制科以代天下之士特旌死節  
以勵天下之忠臨御十年始終一德身衛斯文而

不倦入由其道而莫知克謹持盈諒多遺美屬什  
崇於吉祔用祗薦於鴻名上以慰在天之靈下以  
協造庭之請是諏剛日備舉縟儀謹遣攝太尉其  
官某奉玉冊玉寶上尊謚曰 仁宗伏冀睿靈俯垂歆  
聖文欽孝皇帝廟號 仁宗伏冀睿靈俯垂歆  
流光有永錫羨無疆

英宗皇帝謚冊文

袁楠

伏以瑤圖續緒神已御於鼎湖玉冊揚休禮宜陞  
于太室悼降年之不永儼立政以如新爰述徽猷  
以傳信史欽惟

大行皇帝文明天縱剛健日嚴辨奸邪於嗣位之初彤庭祗畏廣儀注於熙朝之際清廟肅雝雖絕封勅以杜儉人申憲章以勵多士罰茲無赦令必惟行君臨三載而有成知周萬物而莫隱豈運逢艱否大命靡終然號謹追崇尊名是著謹遣攝太尉某官某奉玉冊玉寶上尊號曰  
睿聖文孝皇帝廟號英宗伏惟炳靈有赫歆格無違禘于新宮以妥以宜

皇后冊文

袁楠

皇帝若曰在昔正始之道必先內治于以奉承

宗祧化成天下朕嗣大歷服祗循憲章宜資配助用彰位號咨爾皇后兗吉刺氏淑慎柔嘉遵道是行輔佐正郎謙抑自持寔生元子國本斯建興龍重鎮介子紹封粵若臨御之初贊畫計慮厥相維多正位冲宮天人協祥今遣攝太尉中書右丞相旭邁傑授爾玉冊寶章坤順承天人道攸則表正母儀萬邦是觀維躬儉節用則徽音是嗣惟求賢審官則私謁靡干巨朕德裕朕心實為有頌詩書所稱罔專美于前代噫敬厥初終有慶尚其念哉以膺爾景命

元文類卷十

臣聞統必有宗生嘗得以致其讓廟必有主歿思所以尊其名稽古考文宜天錫誅欽惟

先皇帝夙秉勇智惟時元良體傳次之成言避謳歌而述出雖身居絕域多歷於歲年而義動遠人樂爲之先後德威孔著未堪大業之艱貞事變匪常猶閱生靈而慎動庶來蘇於後戴爰戡定以奉迎已謹清宮俄虛葺屋臣民寡祐永遺惠澤之敷施天日有臨尚想神明之如在禮嚴升祔誠備顯揚謹遣攝太尉某官某奉玉冊玉寶上尊謚曰

翼獻景孝皇帝廟號

明宗伏冀睿慈俯回歆假

克綏丕祚垂裕無疆

元文類卷第十



元文類卷第十一

制

王之加封孔子制

大德十一年九月

閻復

蓋聞先孔子而聖者非孔子無以明後孔子而聖者非孔子無以法所謂祖述堯舜憲章文武儀範百王師表萬世者也朕纂承丕緒敬仰休風循治古之良規舉追封之盛典加號大成至聖文宣王遣使闕里祀以太牢於戲父子之親君臣之義永惟聖教之尊天地之大日月之明奚罄名言之教尚資神化祚我皇元

尚書加封孔子父母制 至順元年

謝端

闕里有家系出神明之由尼山請禱天啓聖人之  
生朕聿觀人文敦求往哲惟孔氏之有作集群聖  
之大成原道統則堯授舜傳之周文王論世家則  
契至湯下逮正考甫其明德也遠矣故生知者出  
焉有開必先克昌厥後如太極之生天地如鉅海  
之有本源雲仍旣襲於上公之封考妣宜眎夫素  
王之爵於戲君子之道考而不繆建而不悖于以  
敦典而叙倫宗廟之禮愛其所親敬其所尊于以  
報功而崇德尚篤其慶以相斯文齊國公叔梁紇

可加封啓聖魯國太夫人顏  
夫人

封啓聖王

封宣聖夫人制

虞集

我國家博典禮以彌文本閨門以成教迺睠素王  
之廟尚虛元媿之封有其舉之斯爲盛矣大成至  
聖文宣王妻并官氏來嬪聖室垂裕世家籩豆出  
房因流風於殷禮琴瑟在御存燕樂於魯堂功言  
邈若於遺聞儀範儼乎其合德作爾禕衣之象稱  
其命鼎之銘號秩秩彝倫吾欲廣關雎鵲巢之化  
皇皇文治天其典河圖鳳鳥之祥可特封大成至

聖文宣王夫人

追封孟子父母制延祐三年十月張士觀

朕惟繇孔子至於孟子百有餘歲而道統之傳獨得其正雖命世亞聖之才亦資父母教養之力也其父夙喪母以三遷之教勵天下後世推原所自功莫大焉稽諸往代實闕褒崇夫功大而位不酬實著而名不正豈朕所以致懷賢之意哉肆頒寵命永賁神休可追封其父為邾國公母為邾國宣獻夫人

追封伯夷叔齊制

闕復

蓋聞古者伯夷叔齊逃孤竹之封甘首陽之介諫爵以明長幼之序諫伐以嚴君臣之分可謂行義以達道殺身以成仁者也昔居北海之濱遺廟東山之上休光垂乎千載餘澤被於一方永懷孤峻之風庸示褒崇之典於戲去宗國而辭周粟曾是列爵之可縻揚義烈以激清塵期於世教之有補可追封伯夷為昭義清惠公叔齊崇讓仁惠公

封周子為道國公制霍希賢

蓋聞孟軻既沒道失其傳孔子微言人自為說諒斯文其末喪有真儒之間生濂溪周惇頤稟元氣

之至精紹絕學於獨得圖太極而妙斡萬化著通  
書而同歸一誠俾聖教燦然復明其休功尚其不  
泯朕守成繼體貴德尊賢追念前脩久稽彝典已  
從廟庭之祀盍疏鄉國之封於歲霽月光風想清  
規之如在玄袞赤帟異寵命之斯承

揚庸教授三氏子孫制

中統元年九月

楊果

孔氏顏孟之家皆聖賢之後也自兵亂以來往往  
失學甘為庸鄙朕甚憫焉今以進士楊庸教授孔  
氏顏孟子弟務要嚴加訓誨精通經術以繼聖賢  
之業

許衡為懷孟教官制

楊果

咨爾許衡天資雅厚經學精專大无講論之間深  
得聖賢之奧受罰者恐陳君所短為盜者畏王烈  
之知所在向風真堪正俗可令於懷孟等處選疎  
子弟俊秀者舉歸教育取作範模再令董子帷前  
有傳授之弟子重使王通門下皆經濟之名臣毋  
畏斯文以弼予治

降封宋主為瀛國公制

時逢屯否嶽瀆分疆運值休明乾坤一統眷靖康  
之餘裔擅吳會之輿區遠隔華夏久睽鄰好我國

家誕膺景命奄有多方炎風朔雪之鄉盡修職貢  
若木虞淵之地靡不來庭歷六合而混同豈一方  
之獨異用慰僊蘇之望爰興問罪之師戈船飛渡  
而天塹無憑鐵馬長驅而松關失險宋主累乃能  
察人心之向背識天道之推移正大姦誤國之誅  
斥群小浮海之議決謀宮禁送款軍門奉章奏以  
祈哀率親族而入覲是用昭示大信度越彝章位  
諸台輔之尊爵以上公之貴可開府儀同三司檢  
校司徒瀛國公

丞相史天澤贈謚制

劉元

周制以八統詔王必先敬故漢官以列爵馭下亦  
自報功古有彝章朕茲申勸故開府儀同三司平  
章軍國重事中書左丞相史天澤性資貞亮器宇  
沉雄自開國以將三軍妙契淮陰之略至分茅而  
推千乘甚高孤竹之風况結知於累朝迨總戎於  
四紀及朕纂承之始克膺輔相之良內秉國均兼  
筦機于右府外清邊祲幾授鉞于齋壇可謂威惠  
之交孚抑亦忠勤之備至繼以荆蠻之蠢重煩汴  
省之趨惟時壯猷行策功而飲至不圖晚志遽引  
年以謝歸申言齒德之尊端愈典刑之益命開府

第協贊廟謀方就佚于尊壘復遺憂于邊閫冀資  
偉筭用一遐陬顧上游之濟師方倚坐籌之勝愴  
中途之病革莫收卧護之勲弗飾厥終曷旌迺績  
宜表出群之行進登符六之階於戲國步方新天  
不憖遺于一老閱章加祿卿其永貞于九原營魂  
有知歆予異渥可贈開府儀同三司太尉謚忠武公  
太保劉秉忠贈謚制  
李槃

臣以忠孝而事上貴輸獻納之誠上以禮義而遇  
臣思篤始終之愛視死之日猶生之年故光祿大  
夫太保參領中書省事劉東忠學窺天人識貫今  
古邃冲而有守安靜而無華昔侍潛藩稔聞高論  
適當二接之際懇上萬言之書蓋將舉天下而措諸安  
以戒為人主者果於服朕嗣服而伊始卿盡力以居多  
蓋得卿實契於朕心而獨朕悉知於卿意事皆有  
驗人匪他求周旋三十年不避其難剴切數百奏  
各中其理共成庶政方圖任於舊人誰謂旻天不  
憖遺於一老興言反此何日忘之載惟台輔之尊  
厥有泉扃之賁是用錫之綸命峻一品之華階祿  
以袞衣躡三槐之正位復加顯號允荅殊勲惟爾  
英靈識予哀寵可贈儀同三司太傅謚文貞公

左丞董文炳贈謚制

李槃

折衝禦侮誠社稷之良臣崇德報功實國家之令  
典途雖殊於生死禮當極於哀榮故資德大夫中  
書左丞僉書樞密院事董文炳王佐之才將家之  
子自出宰於劇縣嘗入侍於潛藩山路間關謁戒  
輅遠趨於六詔風濤洶湧扈龍舟首渡於三江迨  
子嗣服之年委以專征之任截彼淮浦至于海邦  
招降兩浙之新民撫定七閩之故地大小數百戰  
奮不顧身勤勞三十年厥有成績往者睢陽城下  
父已歿放兵鋒比來揚子橋邊男復終於王事一門

忠孝萬古芳香及茲幹事而回方以不次而待何  
言中路殲我良人蓋非卿孰佐於朕躬而獨朕悉  
知於卿意弗頌異數曷慰永懷其陞一品之榮以  
賁九泉之墜倘其有識歆此無窮可贈金紫光祿  
大夫平章政事謚忠獻公

丞相伯顏贈謚制

閻復

天下大統不嗜殺則一之聖主弘功蓋必資於賢  
者昔在至元之際方隆混一之期有來命世之奇  
材懋建殊常之偉績故太傅開府儀同三司錄軍  
國重事伯顏崆峒孕秀列象騰精居政府則不動

聲氣措泰山之安秉戎律則純乎仁義猶時雨之  
降當其聲鶴浦渝盟之罪總龍驤飛渡之師克廣  
世祖好生之心允獲宋人誠服之意衣冠不改市  
肆不易恩威普洽於三吳車書以混文軌以同聲  
教遂覃於百粵逮朕纂承之始益申推戴之誠永  
懷社稷之宗臣宜侈河山之高爵於戲曹侍中江  
南之役規摹一何小哉郭汾陽異姓而王崇報斯  
亦至矣可贈宣忠佐命開濟功臣太師開府儀同  
三司追封淮安王謚忠武

丞相阿朮贈謚制

閻復

邊外開邊四達弗庭之域將門出將三持分閫之  
權緬思百戰之勞宜用九原之賁故光祿大夫中  
書左丞相兼都元帥贈開府儀同三司太尉追封  
并國公謚武宣阿朮英才間世勇略邁倫當

先皇大理之征佐迺父雲南之役靖蠻荒而平交  
趾拔襄漢而下江南薦瘴揮戈萬里若衽席之上  
龍驤飛渡三吳歸掌握之中贊成混一之圖式副  
元勳之號按禮寺易名之典加王章異等之恩於  
戲青史屢書諒騰芳之有永黃河如帶尚流慶於  
無窮可加贈推誠宣力保大功臣太尉開府儀同



三司上柱國追封河南郡王議武定

丞相線真贈謚制

閻復

蕭曹翊漢素非閑閱之家房杜匡唐卒乏鈞衡之  
嗣眷先朝之碩輔綿累世之芳猷永懷弼亮之  
賢庸示褒崇之禮太傅錄軍國重事開府儀同三  
司中書右丞相監脩國史完澤之父故光祿大夫  
中書右丞相宣徽使線真稟靈河嶽著象星辰應  
明良千載之期萃忠孝一門之慶梯天力競元戎  
奠鶉首之郊扶日功高奕葉應龍飛之運惟昔中  
書之草創歷陳治古之宏規位望冠於百僚利澤

施於四海躬承

世祖肇隆中統之丕圖子侍

裕皇復贊元貞之初政方倚具瞻之重宜昭先德  
之華維垣進秩於上台列爵仍疏於大國錫號著  
勲庸之偉易名申節惠之文殊恩允出於朕心卹  
典非由於汝請表南宮雲臺之像旣彰異渥於宗  
臣措天下泰山之安抑助貞勤於上宰尚服休命  
永播英聲可特贈宣忠保德佐理功臣太師開府  
儀同三司中書右丞相追封秦益國公謚忠獻

丞相和理霍孫贈謚制

閻復

北方間氣寔生命世之材黃門清風蓋出登瀛之  
選慨英靈之已往當卹典之崇頒故光祿大夫中  
書右丞相和理霍孫派接元勲慶鍾金德早躡鰲  
峯之首誕披雲漢之章開闢賢開爲司徒而敷五  
教更張化瑟位冢宰以統百官恢揚累世之洪休  
新美至元之大政掄才如崔祐甫之廣潔已有張  
忠定之剛著績熙朝旣闡文明之治疏封列國宜  
居禮義之鄉可贈保德協謀佐理功臣太師開府  
儀同三司追封齊魯國公謚文忠

翰林承旨王磐贈官制

王之綱

崇德報功恩靡忘於先正易名節惠禮具載於彝  
章故翰林學士承旨資德大夫知制誥兼脩國史  
領集賢院事致仕王磐志大以剛識明而遠惟根  
本培植於內者確乎不拔故英粹發越於外者煥  
乎有文出處無愧於心窮達不易其守潛知逆黨  
星言發青社之謀明斥權姦露奏重紫微之柄出  
于藩則用蘇民氣入視草則允契宸衷贊大議於  
廟堂播清芬於簡策諫止東伐奮不顧身請復外  
臺顏然抗疏是以皇祖篤襲喜之眷昭考垂飫賜  
之勤正有待於乞言何屢陳於謝事榮歸梓里庶

衍椿齡朕方嗣照於丕基天不憖遺於一老追惟  
往行惕用興懷俾超進於孤卿仍具頌於寵數於  
戲千古淵源之學茂以踰脩一生忠義之心諒無  
愧軾顧二賢已膺於美謚而兩字宜媿於前休精  
爽如存欽承不昧可贈榮祿大夫少保謚文忠公

左丞許衡贈官制

姚燧

天非繼聖學之墜緒則不生命世之大才國欲與  
王道以比隆肆用爲烝民之多覺何物故之已久  
尚人思之未忘故資善大夫中書左丞集賢大學  
士兼國子祭酒教領太史院事許衡王裕而金相

準平而繩直出處則惟義所在言動亦以禮自持  
休休焉有容屬屬乎其敬人能弘道惟朝聞夕死  
之是期我欲至仁匪晝誦夜思而不得行已似秋  
霜烈日化人如時雨和風來席下之摳衣滿戶外  
者列履達簡在帝心者率多丞弼窮固守師說者  
不失善良鶴鳴九臯而聲聞于高鳳翔千仞必德  
輝乃下爰立相以堯君舜民之志所告上皆伊訓  
說命之言丹宸斥茲少不避雷霆之震擊青臺治  
曆本於筴日月而送迎繇理窮而智益明隨任使  
而職斯舉今既云矣誰其嗣之於虜在爾身有垂

沒世之名於朕心有失同時之恨雖成廟納書以命謚固已振木鐸之高風而功臣胙土則未加用申錫密章於下地光靈如在寵數其承可贈正學垂憲佐運功臣太傅開府儀同三司追封魏國公仍謚文正

元帥烏野而封謚制

姚燧

惟太祖之基命龍遂乘雲有良臣以樹勲魚猶得水展我同姓豈伊異人故金紫光祿大夫北京等路兵馬都元帥烏野而氣鍾光嶽之純全誠貫金石之堅確智足謀國勇則冠軍佐天運之維

新憤人心之未定既降復叛必煩以行故自北而徂南首遼尾魏亦攘左而塞右膺齊背秦語其跋履於四方數豈戎衣之百襲為庸已懋其報宜豐可當非劉氏之不王姑啓若魯侯之大宇併申褒典少慰英靈噫佳城之鬱年三千名固已昭乎白日分國於肇州十二澤期不斬於黃河可贈某官追封營國公謚忠勇公

元帥紐鄰贈謚制

姚燧

朕聞率土之臣莫如同姓干城之將尤可異恩故遠稽於禮經用厚加乎愍冊具官某某在弱冠嘗

為選鋒迅與鷹揚號為萬人之敵虜如虎視隱然  
千里之威屬鉅寇之及郊乏總戎之制闡求可居  
此孰有異然其為人心所歸不待君命之至推使  
秉鉞辭拒循墻即下令於轅門已折衝於尊俎握  
機旗建四川之草木知名開壁鼓行三峽之星河  
動影勇頗牧之非匹策孫吳之可方入阨危則膺  
衆所不先分賜與則如士之最下勁騎所蹙堅城  
每摧如斯宣力於兩朝何止出奇於百戰嗚呼降  
年弗求為烈則多雖狀不及識之亦心未嘗忘者  
置戶以守何樵牧可侵馬鬣之墟故壘即封或魂

魄猶思蠶叢之國可贈其官追封蜀國公謚忠武

丞相阿塔哈封謚制

姚燧

臣為委質勞於同軌之間國以念功恩及祿衣之  
後雖飾終其時有所未及在追恤今日烏可或遺  
爰寵幽褒用昭異數故光祿大夫江西等處行中  
書省左丞相阿塔哈力齊嶽負量與川涵託開國  
將種之苞根挺明堂工師之大木受任閩外賈勇  
籌邊為

憲宗入蜀之前鋒因殘百粵非  
世祖投江以尺箠不返三苗報效之私寤寐不置

百其身以奚恤一迺心之是期會師征險順而貞  
得夫剛決柔之兆考版圖之幅裂秉旄鉞以鼓行  
將削尊號於偏方必使義聲以先路勢乘破竹名  
正包茅有不待陣風蛇之蟠而已飛塵星駟之捷  
如震如怒社金革北方之強于理于疆盡江漢南  
國之紀群黎壺漿而崩角幼主席藁以泥頭瘁事  
匪伊成功能爾凡十年爲丞于行省奄一旦違世  
於先朝白雲香歸于青山清風空遺於黃閣像未  
麟臺之貌服先龍袞之升既進師垣又建王國俾  
大書於神路過者式焉示絕等於臣鄰忠斯勸矣

尚膺茂渥少慰營魂可贈推忠翊運宣力功臣開  
府儀同三司太師上柱國追封順昌郡王謚武敏

平西妻扎刺而氏封王夫人制

姚燧

大帝立極之十五年嘗曰昔我

太祖戡定中夏日不暇給由天未厭宋德故帝制偏  
方命將出師一家天下今惟其時曾不三年墟其  
廟社雖曰睿筭萬舉萬全亦大臣奉辭宣力死職  
忘身有以致茲厥功茂哉用是追崇故光祿大夫  
江西等處行中書省左丞相阿塔哈爲推忠翊運  
宣力功臣開府儀同三司太師上柱國順昌郡武

敏王其故妻扎刺而氏在父母家幽閑而禮其移  
天也淑慎有聞所可盡傷在不壽考以語媿德不  
及見夫丞相建希世之功以語娘賢不得食子大  
夫糾官邪之祿非賁玄壤曷慰貞魂可封順昌郡  
王大人出相一衣天下今封其神官下三平國其  
太師丞相塔刺哈追封淇陽王制太姚燧  
出入帷幄在人十能而已則干訐謀廟堂為相一  
年而疾居半竟邦家之殄瘁宜王禮以追崇故開  
府儀同三司中書右丞相監修國史太保太子太  
師知樞密院徽政使中政使宣徽使左都威衛指

揮使塔刺哈維昔開國之遺苗乃今太師之元嗣  
由爾世曾為我親臣事

世祖至今也凡一朝職食官而久者非一日灼其  
廉明而忠亮與夫恭遜而溫文眷茲中書出庶政  
之原居以右相絕百僚之席使加中政機總六軍  
善調護而長宮師監纂脩以成國史如此重責皆  
所裕為一德可以寬鄙夫片言奚止簡繁務思過  
榮之可懼規俸利以不貪同縮銀艾者十人爾先  
辭免其太尉均受錫田以萬畝爾獨還致於司空  
觀父子之並相一門求聖賢與尚友千古改為改

作緇衣何賴乎武桓拜後拜前赤烏未慙於周魯  
方歌功於清廟倏委魄於玄閭豈意少者沒而老  
者存益信神難明而理難測憐乃公獨傷於漠北  
誓爾後均肝乎淇陽嗚呼何但上下床盡餘子可  
束之高閣如失左右手既正人不作於下泉咨爾  
靈明歆朕休命可特贈封謚爲懷忠昭德佐治功  
臣開府儀同三司太師上柱國淇陽惠穆王

妻昭思靈公主封王夫人制

姚燧

朕自踐阼于今三年洪惟天地祖宗之佑陰陽和  
平星緯咸若民物豐阜邊鄙不聳朕是用大賚于

群工凡嘗執政柄理者必追錫及于三世而伉儷  
之賢亦與嘉褻於戲是曠代之典也具官塔刺哈  
妻某毓秀朱邱作配相門少習儀訓閑於婦道貞  
順著稱垂範閨闈相厥夫子爲世英宰而芳闈早  
萎不終榮顯懿彼宗戚失此女師開吉壤於淇陽  
正邦君之顯位服我新寵妥爾幽靈

耶律鈞贈官制

姚燧

臣克厥艱而始民敏其德子焉能仕皆由父教之  
忠眷予問義之人師實漢僕射之位長固求還笏  
難斷抗章是用追崇莫先庶以垂裕乃後昭文館



大學士中奉大夫國子祭酒耶律有尚之者提領  
東平路工匠所長官鈞中書猶子丞相從兄宗承  
遼室之遺苗禰死金源而全節尚論其世孰踰爾  
家而又誨嗣續善詩禮之敦於以見平生戛統禱  
之習自夫共工之謝晏然同俗之安爭饋肆乎五  
漿振衣岡于千仞奉先惟孝雖耆耄於禴祠也親  
焉接下以恭其臧獲之夕故者民耳匪直入官而  
知止抑展在家而必閔惜棄世於九齡負爲國之  
三老於乎神遊安往定非徇乎故鄉袞寵即封用  
昭章於疑墓嘉誅以副殊渥岡遺可特贈昭文館

大學士資德大夫追封漆水郡公謚莊慎

高麗國王封曾祖父母父母制姚燧

昔我

太祖皇帝之奮舉漠北也東旌西旆分甸南服昭  
德示威所向臣妾惟時三韓境壤相聯天戈一臨  
開府儀同三司太子太師上柱國駙馬都尉瀋陽  
王征東行尚書省右丞相高麗國王王璋之曾祖  
故高麗王王暉深察機運舉國內嚮事會之來間  
不容髮自非秉志端慤明識遠慮疇克如是哉又  
屬遼民餘孽僭竊島嶼狂肆弄兵陸梁假息重煩

命將致討于時冰雪亟寒饋餉不通而噉乃能供  
侍轉輸師皆宿飽軍興器仗資助無闕復濟師徒  
往殄殘寇其於肇造開基立勲王室保民興邦莫  
之與比故得守土享年殆將四紀澤及後昆流慶  
斯永傳子若孫與國連戚不其韙歟是宜追崇上  
爵仍易嘉名魂而有知歆茲異數可贈敦信明義  
保節貞亮濟美翊順功臣太師開府儀同三司尚  
書右丞相上柱國高麗國王謚忠憲

崇德報功法舉追榮之典分邦列爵恩頒及內之  
章酬我舊勲同茲顯號具官高麗國王王璋曾祖

母柳氏傳芳令族作配高門屬皇祚之興隆借名  
藩而臣附明賢所化貞信無頗傳子至孫極富與  
貴三韓保國位同異姓之侯王五等疏封名亞寡  
君之宗室聿新殊渥庸慰淑靈可追封高麗王妃  
朕觀今天下有民社而王者惟是三韓及祖宗而  
臣之殆將百載厥父菑而子復肯播曰我舅則吾  
謂之甥旣勲以親宜貴與富禮克先於事大典可  
後於追崇具官高麗國王王璋之考純誠守正推  
忠宣力定遠保節功臣太尉開府儀同三司征東  
行中書省右丞相上柱國駙馬高麗國王王珣移

孝爲忠易威以惠禮樂刑政之脩者與章文物皆  
粲然惟大猷之是經與小心之以翼初由世子已  
帝女之降釐旋俾嗣三非公孫之復始遂罷時貢  
其方物顧同歲賜於宗親責秉鈞以東征期奠枕  
於南面追叛王挺身於遼水出選兵壓卯以泰山  
戰踵未旋逆首已授雖居位未周於三紀而享年  
實過乎七旬中壽共言今代希有矧其子式穀之  
是似則斯人沒世爲不忘自官階而進之至師垣  
而極矣夫旣封玄菟之墓表滄渤以爲襟何必刑  
白馬以盟誓黃河之如帶尚期貞魄庸服恤章可

贈純誠守正推忠宣力定遠保節寅亮弘化奉慶  
功臣太師開府儀同三司尚書右丞相上柱國駙  
馬高麗國王謚忠烈

三韓爲國五季已王雖居東溟之濱實享南面之  
樂田其先有功于

太祖許帝室以連姻故季女鍾愛於  
世皇即公宮而命醮方穰青軒之桃李俄淒白露  
於薰葭葦懷懿親用隆恤典具官高麗國王王璋  
之妣皇姑安平公主高麗王妃發祥坤掖分冰天  
潢以舜妃癸比之霄明爲古公曹父之姜女善於

媿德車服不矜其夫家樂有娠賢茅土已績其父  
服可謂全妻道之終始苟不因湯沐之安平原進  
大封曷彰尊屬於戲最他邦之道里距比關以五  
千移近甸之河山盡東秦兵十二明靈可作殊報  
是膺可追封皇姑齊國大長公主高麗王妃

元文類卷第十一

